

omnibus iniquitatibus tuis; et quantum meae fragilitati permittitur, auxiliante ipso sis ab ✠ solutus (vel ab ✠ soluta) ante faciem ejus. Qui vivit et regnat in unitate Spiritus sancti Deus, per omnia saecula saeculorum. **R.** Amen.

Deinde conferat indulgentiam plenariam in hac formula:

Concedo tibi indulgentiam plenariam peccatorum tuorum, facultate mihi concessa et commissa virtute Bullarum ordinis Carmelitarum: quod si praesens mortis periculum, Deo favente, evaseris, sit tibi haec indulgentia pro vero mortis articulo reservata. In nomine Patris, et Filii ✠, et Spiritus sancti. **R.** Amen.

¶ Preces in casu necessitatis possunt omitti, et illico aegro absolutio impertiri, antequam e vita discedat.

### Benedictio et impositio

scapularis caerulei B. M. V. Immaculatae.

*Propr. Cler. Regul. Theatinorum.*

Qui suscepturus est scapulare, genuflectat: et Sacerdos superpelliceo et stola alba indutus, capite detecto, dicat absolute:

**V.** Adjutorium nostrum in nomine Domini.

**R.** Qui fecit caelum et terram.

**V.** Dominus vobiscum.

**R.** Et cum spiritu tuo.

Orémus.

**D**omine Jesu Christe, qui tegimen nostrae mortalitatis induere dignatus es, tuae largitatis clementiam humiliter imploramus: ut hoc genus vestimenti, quod in honorem et memoriam Conceptionis Beatae Mariae Virginis Immaculatae, nec non ut illo induti exorent in hominum pravorum morum reformationem institutum fuit, bene ✠ dicere digneris; ut hic famulus tuus, qui

eo usus fuerit (vel haec famula tua, quae eo usa fuerit; si plures suscepturi sint, dicatur: hi famuli tui qui eo usi fuerint; vel: haec famulae tuae quae eo usae fuerint), eadem beata Maria Virgine intercedente, te quoque induere mereatur (vel mereantur). Qui vivis et regnas in saecula saeculorum. **R.** Amen.

Postea Sacerdos nihil dicendo adspersit scapulare vel scapularia aqua benedicta: deinde illud imponit, dicens:

Accipe frater (vel soror) scapulare Conceptionis Beatae Mariae Virginis Immaculatae: ut, ea intercedente, veterem hominem exutus (vel exuta) et ab omni peccatorum inquinamento mundatus (vel mundata), ipsum perferas sine macula, et ad vitam pervenias sempiternam. Per Christum Dominum nostrum. **R.** Amen.

Postea subjungit:

Et ego, ex facultate mihi concessa, recipio te (vel vos) ad participationem bonorum omnium spiritalium, quae in Clericorum Regularium congregatione ex gratia Dei fiunt, et quae per Sanctae Sedis Apostolicae privilegium concessa sunt.

In nomine Patris, et Filii ✠, et Spiritus sancti. **R.** Amen.

Describat nomen ejus (vel nomina eorum) in libro consueto: et dicat, trina vice, flexis genibus, Orationem sequentem vulgari sermone una cum adscripto (vel adscriptis).

Laudes ac gratiae sint omni momento sanctissimo ac divinissimo Sacramento.

Et benedicta sit sancta et immaculata Conceptio Beatae Virginis Mariae.

Hortetur fideles ut haec elogia saepe saepius repetant ad Indulgentias 200 dierum consequendas. (Rescr. Pii VI. d. 21. Nov. 1793; Decr. Pii VII. d. 30. Junii 1818.)



**Ordo applicandi indulgentiam plenariam  
in articulo mortis.**

**D**icatur ab infirmo, si vires habeat, vel ab alio, si infirmus nequeat: Confiteor Deo, etc. a Sacerdote vero Misereatur, et Indulgentiam, etc. Deinde:

**D**ominus noster Jesus Christus, Filius Dei vivi, qui beato Petro Apostolo suo dedit potestatem ligandi atque solvendi, per suam piissimam misericordiam te absolvat: et ego auctoritate ipsius, et beatorum Apostolorum Petri et Pauli, ex speciali gratia mihi tradita, tibi que concessa, a Summis Pontificibus confirmata, absolvo te ab omni vinculo excommunicationis majoris et minoris, (suspensionis), et interdicti, si teneris, in quantum possum, et tu indiges: et restituo te sanctis Sacramentis, Ecclesiae communi, et unitati fidelium. In nomine Patris, et Filii, ✠ et Spiritus sancti.

**R.** Amen.

Item eadem auctoritate mihi tradita, et tibi concessa, ego te absolvo ab omnibus peccatis tuis, quaecumque toto decursu vitae quomodocumque commisisti, de quibus corde contritus (vel contrita), et ore confessus (vel confessa) es, et quorum memoriam non habes usque in praesentem diem, et de quibus confiteri minime recordatus (vel recordata) fuisti: et restituo te illi innocentiae, in qua eras, quando baptizatus (vel baptizata) fuisti, et puritati eidem, in quantum claves sanctae matris Ecclesiae se extendunt. Remitto tibi etiam poenas purgatorii, quas per culpas et offensas contra Deum, et proximum, et teipsum (vel teipsam) commissas incurristi. Claudio tibi portas inferni, januas aperio paradisi: bona per te facta, et facienda, sint tibi in remissionem peccatorum, in augmentum

gratiae, et praemium vitae aeternae: et hoc si in infirmitate, qua aegrotas, decedas; alias ex misericordia Dei salva sint tibi, donec fueris in articulo mortis constitutus (vel constituta). In nomine Patris, et Filii, ✠ et Spiritus sancti. **R.** Amen.

**Benedictio et impositio scapularis  
B. Mariae Virg. de Mercede.**

*Propria Ordinis B. M. V. de Mercede Redemptionis Captivorum.*

**Sacerdos superpelliceo et stola albi coloris indutus, dicit:**

**V.** Ostende nobis, Domine, misericordiam tuam.

**R.** Et salutare tuum da nobis.

**V.** Dominus vobiscum.

**R.** Et cum spiritu tuo.

**Orémus.**

**D**omine Jesu Christe, qui tegimen nostrae mortalitatis induere dignatus es: obsecramus immensa largitatis tuae abundantiam; ut hunc habitum, quem sancti Patres ad innocentiae et sanctitatis indicium ferre sanxerunt, ita bene ✠ dicere digneris, ut qui eo usus fuerit, te induere mereatur. Qui vivis et regnas per omnia saecula saeculorum. **R.** Amen.

Deinde adspargat habitum aqua benedicta, et eo postulantem induat, dicens:

Ego auctoritate Domini nostri Jesu Christi, et Apostolorum Petri et Pauli, et mihi commissa, do tibi habitum Religionis Beatae Mariae de Mercede, propter devotionem, quam geris ad sacratissimam et immaculatam Matrem Dei Mariam, et Ordinem ejus sub nomine fundatum: cum quo in praesenti gratiam Spiritus sancti adipisci valeas, et in futuro



sæculo glóriam ætérnam, quæ præmiu[m] est electórum. In nómine Patris, et Filii, ✠ et Spíritus sancti. **R.** Amen.

Postea dicatur *Hymnus Veni Creátor Spíritus etc. ut supra.*  
pag. 39\*

**V.** Emítte Spíritum tuum, et creabúntur.  
**R.** Et renovábis fáciem terræ.  
**V.** Salvum fac servum tuum (vel ancíllam tuam).  
**R.** Deus meus sperántem in te.  
**V.** Dóminus vobíscum.  
**R.** Et cum spírítu tuo.

**Orémus.**

**A**désto, Dómine, supplicatióibus nostris: et hunc fámulum tuum (vel fámulam tuam) bene ✠ dicere dignéris, cui in tuo sancto nómine hábitum sanctæ religiónis beátæ Mariæ de Mercéde impónimus, quem ex devotióne cupit portáre, dum vitam dúxerit in humánis; ut, te largiénte, et devótus (vel devóta) in Ecclésia persístere, et vitam percípere mereátur ætérnam. Per Christum Dóminum nostrum. **R.** Amen.

**Benedictio alia ejusdem scapularis.**

*Propria ejusdem Ordinis.*

**V.** Adjutórium nostrum in nómine Dómini.  
**R.** Qui fecit cælum et terram.  
**V.** Osténde nobis, Dómine, misericórdiam tuam.  
**R.** Et salutáre tuum da nobis.  
**V.** Dómine, exaúdi oratióem meam.  
**R.** Et clamor meus ad te véniat.  
**V.** Dóminus vobíscum.  
**R.** Et cum spírítu tuo.

**Orémus.**

**D**ómine Jesu Christe, qui tégimen nostræ mortalitátis indúere dignátus es: obsecrámus imménsæ largitátis tuæ abundántiam; ut hoc genus vestimentórum, quod sancti Patres ad innocéntiæ et sanctitátis indícium ferre sanxérunt, ita bene ✠ dicere dignéris, ut qui hoc usus fúerit, te indúere mereátur. Qui vivis et regnas in sæcula sæculórum. **R.** Amen.

**Orémus.**

**P**ater misericordiárum et Deus totíus consolatiónis, qui te máxime mirábilem et laudábilem præbes in gloriosíssima Vírgine Mariá, unigéniti Filii tui matre, qui nobis eam in misericórdiæ matrem donásti, captivorúmque redemptrícem effecísti, in ipsáque glorificári cómplaces: tuam súpplices exorámus cleméntiam; ut super hoc signum (scapuláre seu vestiméntum), pro ipsíus sanctíssimæ Vírginis veneratióne adaptátum, et super quámlibet ipsíus partem, sacram tuam bene ✠ dictionem benígnus effúndas; et præstes, ut qui eam devóte colúerit, potentíssimum redemptrícis supérnæ experiátur auxiliu[m], tuámque misericórdiam piússimam in præsénti et in futúro sæculo. Per eúndem Christum Dóminum nostrum.

**R.** Amen.

**Orémus.**

**C**lementíssime Dómine Deus, qui Beatíssimam Vírginem Mariám, Filii tui felicíssimam matrem, býssino splendénti et cándido in ætérnum fulgére fecísti: bene ✠ dicere, quæsumus, velis album istud operiméntum, in ejúsdem Vírginis Matris, captivórum auxiliatricis, honórem consecrátum; ut, qui



venerétur devóte, a malis ómnibus sit liber, et supérno býssino in cœlis vestíri mereátur. Per eúmdem Christum Dóminum nostrum. *R.* Amen.

*Adspargatur aqua benedicta.*

### Benedictio et impositio scapularis

#### B. Virg. Mariæ sub titulo Salus Infirmorum.

*Propria Clericorum Regul. Infirmis Ministrantium.*

#### Formula benedicendi scapulare.

- V.* Adjutorium nostrum in nómine Dómini.  
*R.* Qui fecit cœlum et terram.  
*V.* Dómine, exaúdi oratióem meam.  
*R.* Et clamor meus ad te véniat.  
*V.* Dóminus vobiscum.  
*R.* Et cum spíritu tuo.

*Orémus.*

**B**éne ✠ dic, Dómine, quæsumus, indumentum hoc: et præsta, ut quicumque illud in honorem Mariæ Deiparæ Salútis Infirmórum sumpserint, mentis et corpóris sanitate gaudeant, et in hora éxitus sui ad vitam perducántur æternam. Per Christum Dóminum nostrum. *R.* Amen.

*Deinde adspargatur aqua benedicta.*

#### Formula benedicendi parvas cruces rubri coloris scapularibus adnectendas.

- V.* Adjutorium nostrum in nómine Dómini.  
*R.* Qui fecit cœlum et terram.  
*V.* Dómine, exaúdi oratióem meam.  
*R.* Et clamor meus ad te véniat.  
*V.* Dóminus vobiscum.  
*R.* Et cum spíritu tuo.

*Orémus.*

**B**éne ✠ dic, Dómine, cruces istas, ut sint remedium salutáre fidélibus: et præsta per invocatióem sancti Nóminis tui, ut quicumque eas portáverint, corpóris sanítatem, et ánimæ tutelam accípiant. Per Christum Dóminum nostrum.

*R.* Amen.

*Orémus.*

**O**mnípotens sempitérne Deus, qui crucis signum pretiósó Filii tui sángine consecrásti, per eámdem sanctíssimam crucem, et mortem ipsíus Filii tui Jesu Christi, mundum redímere voluísti, ac per ejúsdem venerábilis crucis virtútem hóminum genus ab antíqui hostis tyránnide liberásti: te suppliciter exorámus, ut tua pietáte has cruces benedicere dignéris, et cœléstem ejus virtútem et grátiam impertíri; ut quicumque eas super se gestáverit, cœléstis grátiae plenítudinem recípere, et Christum contra omnes diabólicas versútias defensórem habére mereátur: qui tecum, et cum Spíritu sancto vivit et regnat, per ómnia sœcula sœculórum. *R.* Amen.

*Deinde adspargantur aqua benedicta.*

#### Formula benedicendi coronam Domini pro agonizantibus.

- V.* Adjutorium nostrum in nómine Dómini.  
*R.* Qui fecit cœlum et terram.  
*V.* Benedíces coronæ anni benignitátis tuæ.  
*R.* Et campi tui replebúntur ubertáte.  
*V.* Dómine, exaúdi oratióem meam.  
*R.* Et clamor meus ad te véniat.  
*V.* Dóminus vobiscum.  
*R.* Et cum spíritu tuo.



## Orémus.

**D**ómine Jesu Christe, qui in similitúdinem hóminum factus, et in mundo conversátus, tam multa pati pro hóminum salúte, et in cruce mortem subíre voluísti: dignáre, quásumus, hanc benedícere et sancti ✠ ficáre corónam; ut qui eam pie gestáverit, et devóte recitáverit, múltiplici grátia et indulgéntiæ tuæ dono ditátus, ætérnam in cœlo corónam obtinére mereátur: et fideles étiam toto orbe terrárum in extrémis laborántes, misericórdia tua adjúti, de agóne ad perpétuam tuæ claritátis glóriam pertíngere váleant. Per te, Jesu Christe Salvátor mundi: qui vivis et regnas cum Deo Patre in unitáte Spíritus sancti Deus, per ómnia sœcula sœculórum. **R.** Amen.

Deinde adspargatur aqua benedicta.

## Orationes recitandæ

cum fideles piæ societati adscribuntur.

**V.** Adjutórium nostrum in nómine Dómini.

**R.** Qui fecit cœlum et terram.

**V.** Dómine, exáudi oratióem meam.

**R.** Et clamor meus ad te véniat.

**V.** Dóminus vobíscum. **R.** Et cum spíritu tuo.

## Orémus.

**O**mnípotens et miséricors Deus, te humíliter deprecámur: ut qui piæ huic societáti nomen déderint, beatíssimam Vírginem Mariam infirmórum salútem exorántes, et córporum medéllam obtíneant, et ánimæ sanitátem. Per Christum Dóminum nostrum. **R.** Amen.

## Orémus.

**D**eus, qui ineffábili providéntia beátum Joseph sanctíssimæ Genitricis tuæ Sponsum eligere

dignátus es, eíque moriéti una cum ipsa Immaculáta Vírgine adstitísti: concéde; ut, eo intercedénte, in hora éxitus nostri sanctíssimum tuum et Mariæ nomen invocémus, atque ætérnam íngredi réquiem valeámus. Qui vivis et regnas cum Deo Patre in unitáte Spíritus sancti Deus, per ómnia sœcula sœculórum. **R.** Amen.

## Orémus.

**D**eus, qui sanctum Camíllum singulári caritátis prærogátiva decorásti, ac novæ prolis ad infirmórum subsídium effecísti patrem: ejus méritis et intercessióne concéde; ut, qui ægrotándo labórant, ad ánimæ salútem proficiant sempitérnam. Per Christum Dóminum nostrum. **R.** Amen.

## Formula adhibenda

dum scapulare porrigitur.

**A**ccipe frater (vel soror) hábitum hunc, singuláre signum piæ societátis sub título sanctíssimæ Vírginis de Salúte, ac sanctórum Joséphi et Camílli, ut ita indútus (vel indúta) sub eórum patrocinio perpétuo vivas. **R.** Amen.

## Formula adhibenda

dum corona porrigitur.

**A**ccipe corónam Dómini nostri Jesu Christi, in memóriam passióis ejus contéxtam: ut, cum eum ore laudáveris, omnes in agóne constitúti patienter dolóres sustíneant, et ad vitam pervéniant sempitérnam. Per eúndem Christum Dóminum nostrum. **R.** Amen.

Pax et benedíctio Dei omnipoténtis, Patris, et Fílii, ✠ et Spíritus sancti, descéndat super te, et máneat semper. **R.** Amen.